

von Wulf Wager

# Hasatod



Ausgerechnet am Oschter-sonntag isch onser Wach- und Kampfhas', a Zwergkaninchen, gstorba. Em biblische Alter von elf Johr. Jetzt isch Staatstrauer bei ons a'gsagt, obwohl insgeheim alle Beteiligte eigentlich dia Hasazeit scho seit längerem am liebschta beendet gsäh hättat. Des Karnikkel isch em zarta Alter von femf Wocha zu ons komma. Meine Mädla

hend des domols ganz heimtükisch eig'fädelt. Beim Dorfesch hot's en Flohmarkt geba ond do hot ebbir junge Kaninchen mitsamt em Käfig vrkauft. I han scho femf Halbedronka ghet ond ben ganz guat drauf gwäa. No isch mei hinterhältige Jüngschte komma, hot mi mit ihre schwarze Haselnussauga a'ghimmelt ond gfrogt, ob sie a Häse kriega dät. 's dät bloß femf Euro koschta. Des war a stichhaltigs Argument für mi als Schwob. Also han i en meim Achtelballa glei zwoi Häsla kauft, damit des oine net so alloi isch. Mr isch jo schließlich Tierfraind.

Mei Schwogr, dr Schreiner, hot ons a wahnsinnig tolles Luxus-Hasahaus aus Holz, mit Biberschwänz deckt ond zwoi abteilbare Ställ samt Fußbodaheizung baut. Alloi 's Material hot domols femfhundert Euro koschtet. Wenn i des vorher gwisst hät. Jedafall hend's dia Häsla bei on richtig schee ghet.

Jetzt hend dia zwoi Häsla Jonge kriegt. 's erscht Mol vier und vier Wocha später scho wieder femf, obwohl mr ons gsagt hot, des wärat zwoi Weibla. Dem biologische Wundr hend mir obengt Ei' halt gebieta miassa ond den Hasama' kaschtriera lassa. 60 Euro!! Des hot aber sei Weible net verstanda wella ond isch alle vier Wocha wie a rallige Katz om den arma offasichtlich luschtlosa Hasama' romg'hopft, hot sich auf en drauf gesetzt ond vrsucht zu stimuliera. Aber do hot net amol meh a Hasaviagra ebbes gnützt. Des hot se so krank gmacht, dass mr se hot operiera miassa. 180 Euro! Se isch no trotzdem zwoi Wocha später trotz ra zwoita Operatio (240 Euro!!!) gstorba. Jetzt hot onser Hasama' des durchaus luxeriöse Rentnerläba gführt: er lebt alloi en ra viel zu große Hasavilla. Dr Has isch älter ond älter worda, obwohl Kaninchen eigentlich höggschtens 7 Johr alt werdat. Von meine Mädla hot en längscht koina meh vrsorgt. Noch dem Hasaseniore han i ganz alloi guckt. Schließlich miassat mir Männer zamma halta. Ond jetzt isch'r gstorba. Noch elf Johr! Ganz schnell hemmr dia Hasavilla vr'schenkt. Dera Familie mit dem kloina Bua han i nadierlich net vrzehlt, mit was für Folgekoschta do zu rechna isch. I werd jetzt des künftige sparte Geld en an guada Kaninchenbrota a'lega...

Bis näggschd Woch'

Wulf Wager